



## La cooperazion rural ntan Fodom

Puoc agn davò che l'é sté metù su na Cassa Rural nte l'Aut Adesc, en particolar a Rina de Marebe del 1889, vegniva istituida na bânca cooperativa che se ispiráva ai prinziipi de Wilhelm Raiffeisen (1818-1888), prinziipi de cooperazion mutual senz fins de speculazion a nivel privat.

L'pensier de F.W. Raiffeisen l'miráva a favorì i sòzi e chi del luoch mpieghèi nte operazion e servisc de bânca, a miglioré la condizion moral, cultural e economica de ste persone e a promuove l'svilup de la cooperazion, de l'educazion al sparagn e de la previdenza.

Nfati del 1894 vegniva fondada la Cassa Rural dei Mutui con senta a la Plié da Fodom su scomenciadiva de Vigile (Vigilio) Delazzer (da Pecei), de Giovanni Grones da Rèba, de Bepo (Giuseppe) Delmonego da Ornela, de Piere (Pietro) Dorigo de Lasta, de Mattia Demattia da Salejei e de Piere de Giorgio Crepaz da Chièrz.

Da testimoniánze se sa che i agn delongo davò la Pruma Vièra mondial, la jent da Fodom la consegnáva i suoi sparagn an zèrto Piere Lazer (probabilmente l' cassier de la Cassa Rural e dei Mutui), na persona studiada e culturada che godèva plèna fiduzia da pèrt de la popolazion fodoma. I agn 1930 e davò i ven recordèi com agn dassèn grief economicamente, con gran inflazion da reduje a nia duc i sparagn che eva stèi depositei n bânca. Ven dit che, a chi temp degugn i eva stèi bogn de recuperé suoi vadagn e che bèrba Piere Lazer l' fossa mòrt prèst davò. I agn davò i Fodomi metèva i suoi sparagn nte l'Ufize de le Pòste de La Plié, de Corvèra e de Bornech. La Cassa Rural e dei Mutui la no n'ava plù mesi per jì nnavànt e del 1943 chèsta la vigniva tutta via del dut. Per plù de chindesc agn a la longia l' Comun da Fodom l' eva resté senza na bânca e demè del 1960 ruáva sa na Rèba la Cassa de Sparagn de Verona, Vicenza e Belum, ncuoi diventada Unicredit Banca.

Caránta agn davò che l' eva

stada sarada la Cassa Rural dei Mutui, Fodom l'a bu ndavò sua Cassa Rural. Nfati l' 8 de dezembro del 1991 la Cassa Rural de la Val Badia ( ncuoi clamada Cassa Raiffeisen de la Val Badia) l' à scomencé sua ativité nte Rèba. Dal 2005 nca l' é ence operatif en Bancomat a la Plié da Fodom.

La decijion de giourì nta Rèba na filial de la Cassa Raiffeisen de la Val Badia la no n'è stada ciapada a freit e con fin blot comercial, ma l' é stada na lieta madurada ntel temp, che à tignù cont de la parentela sozial e cultural e de l'identité stòrica con Fodom

L' é stada, spò, no demè na decijion economica, ma ence de vera amicizia chersciuda su da agn de rapòrc strenc de colaborazion con jent da Fodom e dan valgugn clienc Fodomi che ava bele bu a ci fè co la senta de Corvèra.

La Cassa Raiffeisen l' é na cooperativa col fin prum de garanti a la comunité bone condizion, efficienza e sveltéza nte i rapòrc co la clientela, con degune complicazion nte le operazion e nte l'ofièrta dei serviji, senza fè diferenze nnànter pichi e gragn clienc e ben intenzionada a investì n sòna capitali trac ite e la richèza faturada.

Ajàche la mascima pèrt del utile che la Cassa Raiffeisen fèsc, e che come impreja l' à da produje, l' ven metù a riserva , la Cassa la se prejeta come na istituzion stagna e segura. Sto fat l' é renforzé da mecanismi de solidarieté che ejiste a nivel nazional nnànter i vari grop de l'organizacion.

Co la giourida de na filial nta Rèba, la Cassa Raiffeisen l' à volù nlouta slargé fòra ence a la comunité da Fodom i benefizi che fin a ncuoi l' à porté a la Val Badia.



Dr. Canins Benno



**Raiffeisen**

Cassa Raiffeisen Val Badia

[www.valbadiaonline.it](http://www.valbadiaonline.it)